

《執法者們》煞科慰勞宴打情罵俏

黃宗澤懶理緋聞 嗌蔡潔做老婆

■蔡潔與黃宗澤公然耍花槍，不擔心再傳緋聞。



緋聞情侶黃宗澤 (Bosco) 與蔡潔於新劇演夫妻，二人前晚出席活動時，Bosco 毫不忌諱稱呼女方做老婆，又不停打情罵俏。事後他笑言不擔心跟蔡潔再傳緋聞，雙方實在太熟，拍咀戲也不感尷尬。

吳啟華、黃宗澤(Bosco)、羅子溢、洪永城(Tony)、蔡潔及陳滢等前晚出席新劇《執法者們》煞科慰勞宴，Bosco 豪不避忌，嗌蔡潔做老婆，非常玩得。二人受訪時表示第8次合作才演一對，Bosco 說：「經過7度磨練先做到一對，不過係好悲慘故事。(冇得錫?)有得錫，咁靚嘅女仔有得錫梗係錫啦！」他笑指與蔡潔太熟，拍咀戲不感尷尬，但強調咀戲不是重點：「係我咁耐以嚟為一個女人喊得最多嘅一套劇，好慘！」

蔡潔大讚 Bosco 演得好，喜歡看他的打鬥戲，以及於劇中為她搵手袋及流淚，Bosco 笑言：「蔡潔好似讚緊你，但其實係插你一刀！」他踢爆蔡潔有更性感演出：「我都諗緊拍完之後播唔播到出街，上次佢已經露白滑玉背，今次仲突破，所以觀眾要留意。(有親熱戲，擔心再傳緋聞?)以前傳過，依家再傳都唔會傳得出啲也！」

吳啟華表示跟陳滢曾合作拍劇，但全無交集，今次也只得一次接觸：「就係佢嚟拘捕我嗰幕。」並讚女方演技有進步。問到若再合作想演什麼關係？他說：「當然係父女。」陳滢則笑言：「姊弟都有問題。」問到在劇中有何突破？她說：「原本有一幕性感沖涼戲，講我沖緊涼時馬國明走咗入嚟，當日我仲帶泳衣同打底裝備到場，點知導演見到我就話唔使喇，取消沖涼戲，改咗喺廚房煮嘢食。」她笑言至今仍不明原因。



■洪永城(左)笑言想與子溢太太拍情慾戲。

洪永城想與楊茜堯拍情慾戲

子溢跟 Tony 太太梁諾妍於劇集《家族榮耀之繼承者》有情慾戲，Tony 指事前看過劇本，但當時太太剛懷第2胎，仍未能宣



■陳滢笑言想跟吳啟華演姊弟。

布，故唯有通知子溢，叫他拍攝時盡量「輕手」。問 Tony 想不想「報復」跟子溢太太楊茜堯拍情慾戲？他笑言：「梗係想啲！但我邊有咁嘅榮幸，無綫有好多排緊，有排都未到我，哈哈！」問到會否限制太太演情慾戲？他坦言：「我知道做戲係工作一部分，唔會設限。」

做事業型女性支響儀自主人生

支響儀(Venus)日前到電台受訪，提到她參加《中年好声音》前已經經營烘焙店，並於馬來西亞和菲律賓設有分店，她說：「零失手整蛋糕係我哋服務宗旨，希望今年可以喺加拿大開分店。」問到參加比賽最大得着是什麼？她說：「我搵到屬於自己把聲，以前唔知點發聲，但韋綺珊老師教我之後，咁類型嘅歌我都試過。」Venus 又指新歌《Gotta Try》是其座右銘：「作為媽媽同事業型女性，自己嘅人生要自己主導。」



■支響儀事業與家庭均美滿，羨煞不少女士。

問到家人如何支持自己？Venus 甜絲絲說：「我老公好低調，成日唔想上鏡，但佢私下畀我好多意見，例如呢首歌唱直播要點樣唱，作為聽眾，佢會覺得你咁唱會喘氣。我媽咪見到有啲報道會話為你驕傲，佢覺得呢個圈好浮沉，會提醒我當有咗價值時，就將原有嘅能量去番自己嘅事業。」

李幸倪新歌受楊紫瓊啟發



■李幸倪新歌以情緒勒索為主題。

李幸倪(Gin Lee)新歌《告別煤氣燈》前晚正式上架，歌曲以「情緒勒索」為主題，她透露從去年贏得奧斯卡的楊紫瓊及關繼威身上獲得啟發，加上自身經歷，希望藉新歌鼓勵大家學懂如何平衡聽取意見，以及聆聽內心真實需求。Gin 表示跟填詞人鍾說討論了很久歌曲內容：「就係要衝破一啲你最親嘅人，可能係你屋企人、最好朋友或者另一半，有時佢哋會唔小心情緒勒索你，要衝破佢哋畀你所有枷鎖。」由於歌曲講述較深層的議題，Gin 希望有視覺上的衝擊：「好似真實同科幻之間，所以有啲場景係有啲抽象。」

陳柏宇身經百戰依然緊張

陳柏宇日前到新城廣播接受《梨事會》主持葉文輝訪問，身為兩女之父的柏宇工作繁忙，回家又要照顧女兒，問到可有私人時間？他說：「我打高爾夫球已經係休息，打咗都有10年，有時做 gym、開車、大便，甚至個女喇咗都有 me time。」

出道18年的柏宇舞台經驗豐富，但原來每次上台都會緊張到心跳加速，問到會否影響演出？柏宇說：「呢個其次，係唔知唱歌時隻手放喺邊，好多嘢要顧。綵排時我從來唔會諗自己要做乜，只需要理把聲唱得好唔好。」



■陳柏宇(左)接受葉文輝訪問。